



**S**igismundus ex illustri familia natus, & in omni genere literarum & uirtutum à teneris annis educatus fuit, in quibus etiam plurimum profecit: erat enim felici ingenio præditus, atq; magna prudentia & rara facundia conspicuus. Itaq; Maximilianus Cæsar eum plurimum dilexit, & in suū consilium admisit. Eo tempore anno 1515 reges Poloniæ, Vngariæ, & Boëmiæ Vniennam ad Cæsarem uenerunt, & contractis ac conclusis filiorum & nepotum matrimonijs, inter se amicitiam & pacem confirmarunt. Inter cætera Maximilianus pollicitus erat, se Oratores suos ad Basilium Moscorum ducẽ missurum, qui inter hunc & Poloniæ regem quoq;

pacem facerent. Ad eam legationem Cæsar hunc Sigismundũ ordinauit, qui etiam initio sequentis anni, cum ex Dania redisset, hanc longinquam & periculofam profectionem suscepit, & ad Moscouiam urbem perueniens, omnia optimè expediuit, quanquam eo tempore nihil poterat perfici, cum Polonus interim, dum de pãce ageret, instructo exercitu Opotzka castrum oppugnabat. Itaq; Sigismundus Oenipontum ad Cæsarem redijt, & non solùm quæ in mandatis habuisset retulit, uerùm etiam Moscouitarum ceremonias, leges, & res gestas ordine enumerauit: quo quidem sermone Cæsar plurimum delectatus fuit. Postea à Cæsare in Vngariam ad Ludouicum regem Legatus mittitur, atq; negotio cõfecto ad Cæsarem redijt, qui etiam sequenti Ianuario 1519 obiit.